



ISLAMSKA ZAJEDNICA U BOSNI I HERCEGOVINI

RIJASET

Ured za hadž i umru

Broj: 09-03-7-3679/25

Datum: 01.08.2025.

07. safer 1447.

MUFTIJSTVIMA U BOSNI I HERCEGOVINI

MEDŽLISIMA U BOSNI I HERCEGOVINI - putem muftijstava

MEŠIHAT U SLOVENIJI

KROVNE ORGANIZACIJE ISLAMSKE ZAJEDNICE U DIJASPORI

Predmet: Obavijest o organizaciji hadža 1447. po Hidžri/2026. godine i proceduri apliciranja

Uz izraze poštovanja i zahvalnosti na dosadašnjoj saradnji dostavljamo vam informaciju o planiranim zajedničkim aktivnostima na planu organizacije hadža 2026. godine.

Ovim putem Vam dostavljamo i osnovne informacije o putovanju na hadž 2026. godine i uputstvo o načinu popunjavanja, prijemu i obradi aplikacija za hadž.

Informacija o putovanju

- očekivani polazak: u periodu od 18. maja do 23. maja 2026. godine, očekivani povratak: periodu od 05. juna do 11. juna 2026. godine;
- letovi:
 - o u odlasku let Sarajevo – Džedda,
 - o u povratku let Medina – Sarajevo;

Obavezni dokumenti

- bosanskohercegovački pasoš s rokom važenja nakon 10.12.2026. godine,
- potvrda o vakcinaciji protiv meningokoknog meningitisa uz uvjet da vrijeme prošlo od primanja vakcine bude najmanje 10 dana i ne duže od 5 godina.

Zdravstvena ograničenja

Ministarstvo zdravlja Kraljevine Saudijske Arabije zabranjuje putovanje na hadž osobama u stanju bolesti, koje utiče na psihofizičke sposobnosti potrebne za obavljanje hadža. To uključuje sljedeća oboljenja ili zdravstvena stanja:

- Zatajenje jednog od vitalnih organa (srce, pluća, jetra ili bubrezi),
- Neurološki ili psihijatrijski poremećaji koji ometaju kogniciju ili su praćeni teškim motoričkim poremećajima (npr. epilepsija, šizofrenija),
- Demencija u starijoj životnoj dobi,
- Trudnoća u posljednja dva mjeseca trudnoće,
- Rizična trudnoća u bilo kojoj fazi,
- Aktivni karcinomi uz hemoterapiju, biološku ili radioterapiju,
- Zarazne bolesti koje ugrožavaju javno zdravlje, poput akutne tuberkuloze i hemoragijskih groznica.



Osobama mlađim od dvanaest godina ulazak u KSA radi obavljanja hadža je zabranjen.

Odlukom Ministarstva za hadž i umru Saudijske Arabije procenat osoba starijih od sedamdeset godina u ukupnom broju hadžija pojedine države može biti maksimalno 7 %, što u slučaju Bosne i Hercegovine iznosi 155 putnika na hadž.

Proces prijavljivanja za hadž 2026. godine podijeljen je u tri faze.

Prva faza: Popunjavanje aplikacije

Kao i prošle godine aplikacijski formular za prijavljivanje za hadž 2026. godine dostupan je svim zainteresiranim aplikantima. To znači da će svaki aplikant pristupanjem linku, koji će biti dostupan na web stranici Ureda za hadž i umru (<https://www.hadziurmra.ba/>), biti u mogućnosti popuniti aplikacijski formular. Najava početka prijava će na stranici Ureda za hadž i umru biti objavljena 01.08.2025., a link za prijave će biti aktivan 11.08.2025. u 08:00 sati. Pored aplikacijskog formulara proces prijavljivanja za hadž obuhvata i popunjavanje formulara za vizu Saudijske Arabije i elektronsko potpisivanje ugovora sa Rijasetom IZ-e u BiH. Po završetku popunjavanja formulara, aplikant pritiskom na „Pošalji prijavu“ i dobijanjem e-maila kojim se potvrđuje uspješnost prijave završava proces apliciranja. Nakon toga organizaciona jedinica, koju je aplikant odabrao, ima uvid u aplikaciju i mogućnost eventualne intervencije u pojedinim segmentima iste.

Svaki aplikant odabire muftijstvo i medžlis kojem pripada, a u slučaju da živi van Bosne i Hercegovine u polju „Muftijstvo“ odabire „Dijaspora“, a u polju „Medžlis“ odabire državu u kojoj boravi.

Pripadnost muftijstvu, odnosno medžlisu/državi može biti po jednom od dva osnova:

- a) članstvo u medžlisu/državi prijave,
- b) mjesto prebivališta ako se radi za pripadnike

Pripadnost muftijstvu odnosno medžlisu dokazuje se:

- a) Potvrdom o članstvu u medžlisu prijave
- b) CIPS

Zadatak odgovornih lica u medžlisima i krovnim organizacijama je da pristupe svakoj novoj aplikaciji i označe polje „Član IZ“ ako se radi o članu Islamske zajednice. Ukoliko se ne radi o članu IZ-e odgovorna lica će uvidom u aplikaciju, polje „Mjesto izdavanja pasoša“ utvrditi da li se radi o licu čiji pasoš je izdat na prostoru koji pokriva njihova organizaciona jedinica.

U slučaju da nadležni službenici medžlisa, muftijstva ili krovne organizacije utvrde da je aplikant u HAF (Hadžski aplikacijski formular) upisao da pripada medžlisu ili muftijstvu kojem ni po kom osnovu ne pripada, aplikant će biti izbrisan sa preliminarnog spiska putnika organizacione jedinice u koju se prijavio.

Izuzetno, ukoliko aplikant upiše da pripada medžlisu ili muftijstvu kojem ni po kom osnovu ne pripada, pa sam zatraži ispravku u toku trajanja prijava, Ured će izvršiti ispravku, pri čemu će mu pozicija u novom medžlisu biti određena shodno vremenu njegove prvobitne prijave. Odgovorna lica organizacionih jedinica su dužna kontaktirati aplikanta kojeg prema gornjim odredbama trebaju brisati, upoznati ga s problemom i sugerisati mu da se obrati Uredu za hadž koji je jedini ovlašten za izmjene u poljima „Muftijstvo“ i „Medžlis“.

Podatak o nečijem članstvu i prebivalištu je od ključne važnosti za narednu fazu u kojoj Ured za hadž formira liste putnika poštujući odredbe člana 12. Pravilnika o organizaciji hadža, koji nalaže da se preliminarni spisak putnika na hadž formira prema vremenu prijave, a prema sljedećim prioritetima:



- a) Članovi Islamske zajednice u Bosni i Hercegovini koji prvi put idu na hadž,
- b) Pripadnici Islamske zajednice u Bosni i Hercegovini koji prvi put idu na hadž,
- c) Članovi Islamske zajednice u Bosni i Hercegovini koji ponovo idu na hadž za sebe ili kao bedeli,
- d) Pripadnici Islamske zajednice u Bosni i Hercegovini koji ponovo idu na hadž za sebe ili kao bedeli.

Ova faza počinje 11.08.2025. u 08:00 sati i završava se 29.08.2025. u 16:00 sati.

Druga faza: Prijem dokumenata

Po završetku prve faze Ured za hadž i umru će utvrditi broj aplikanata po muftijstvima, mešihatima, krovnim organizacijama i medžlisima, uključujući i osobe koje su se prijavile za prethodni hadž i koje nisu putovale a za hadž 2026. godine imaju prioritet. Shodno procentualnom učešću aplikanata, muftijstvima će biti dodijeljen procenat iz kvote odobrene Rijasetu IZ-e u BiH. Medžlisima se po istom principu dodjeljuje procenat shodno njihovom udjelu unutar broja dodijeljenog muftijstvu. Mešihati i krovne organizacije se u ovom segmentu tretiraju kao jedno muftijstvo a svaka pojedinačna država kao jedan medžlis. Ured za hadž i umru će dodijeljene procenat pretočiti u broj hadžija (kvotu) za svaku organizacionu jedinicu nakon čega se o istima očituje Rijaset.

Nakon što Rijaset odobri predložene kvote, Ured organizacionim jedinicima dostavlja spisak imena svih aplikanata podijeljen na one koji će putovati na hadž i na one koji su na listi čekanja. Pri sačinjavanju spiska putnika i onih koji su na čekanju, Ured će poštivati odredbe Člana 12. Pravilnika. U slučaju naknadnog odustajanja nekog od putnika, organizacione jedinice uz prethodnu najavu Uredu, kontaktiraju sljedećeg sa spiska osoba na čekanju.

Nakon što od Ureda dobiju imena putnika medžlisi, mešihati i krovne organizacije kontaktiraju buduće putnike na hadž i od njih zahtijevaju dostavljanje bosanskohercegovačkog pasoša i potvrde o vakcinaciji protiv meningokoknog meningitisa - žuti karton (stranice sa imenom i podacima o vakcini) ne starije od pet godina. Putnik na hadž snosi troškove vakcinacije. Organizacione jedinice kontaktiraju i one koji nisu na spisku putnika i informišu ih da su na spisku putnika za naredni hadž.

U skladu sa nalogima Ministarstva zdravlja Saudijske Arabije putnici na hadž će biti obavezni dostaviti potvrdu nadležne zdravstvene ustanove da ne boluju od jedne od ranije spomenutih bolesti. O vremenu dostavljanja potvrde i njenoj formi putnici će biti blagovremeno informisani.

Svaki hadžija na sebe preuzima odgovornost obavljanja hadža bez dodatne pomoći Ureda.

Službenici medžlisa, mešihata i krovnih organizacija skeniraju ove dokumente i prilažu ih ranije pripadajućoj prijavi. U izuzetnim slučajevima, putnik dokumente može dostaviti putem e-maila ili na drugi prigodan način.

U slučaju da pasoš putnika ističe prije 10.12.2026. od putnika će biti zatraženo da u što kraćem roku izvadi novi pasoš. Ured za hadž i umru će organizacione jedinice blagovremeno informisati o početku prijema i skeniranja dokumenata.

Muftijstva koja neposredno, bez posredovanja medžlisa od putnika primaju dokumente ovu radnju realiziraju u svojstvu medžlisa.

Ovlašteni službenik nadležne organizacione jedinice vrši provjeru tačnosti podataka unesenih u HAF na osnovu priložene dokumentacije. U slučaju da uoči nedostatke u HAF-u službenik će izvršiti potrebne ispravke ako mu to dozvoljavaju ovlaštenja dodijeljena njegovoj organizacionoj jedinici. Ako nema ovlaštenja za ispravku nedostatka dužan je kontaktirati Ured za hadž.

Pasoš i žuti karton se ne izuzimaju od strane organizacionih jedinica i oni kod putnika ostaju sve do ulaska u Saudijsku Arabiju. Nadležni službenici neće printati aplikacijski formular, niti je putnik dužan isti potpisati.



Skenirane dokumente imenovati na način: PREZIME IME - PASOS, PREZIME IME – KARTON (npr. MUJIC MUJO – PASOS, MUJIC MUJO – KARTON). Nazive skeniranih i učitanih dokumenata pisati bez afrikata i velikim slovima, redoslijedom iz prethodnog primjera.

Dokumente skenirati u visokoj rezoluciji (600 dpi) i JPG/JPEG formatu. (VEOMA VAŽNO)

Obratiti pažnju da skenirani dokumenti budu dodijeljeni odgovarajućoj aplikaciji, jer u suprotnom može doći do greške u procesu ishođenja vize, što za sobom povlači stanovite finansijske obaveze Ureda prema nadležnim tijelima Saudijske Arabije. Ove troškove će snositi organizaciona jedinica koja je propust napravila. (VEOMA VAŽNO)

U skladu sa Članom 17. Pravilnika o organizaciji hadža organizacione jedinice su dužne do 1. džumadel-ula (23.10.2025.) izvršiti unos dokumenata u HAF. Organizacione jedinice koje ne izvrše unos dokumenata u zadanom roku snose odgovornost za brisanje lica sa spiska putnika.

Po završetku spomenutih radnji, kompletiranu aplikaciju medžlisi označavanjem polja „Procesuirao medžlis“ prosljeđuju muftijstvima, a mešihati i krovne organizacije Uredu za hadž. Muftijstva su dužna izvršiti kontrolu ispravnosti svake aplikacije pojedinačno:

- Da li je HAF pravilno popunjen,
- da li su svi traženi dokumenti priloženi odgovarajućem HAF-u,
- da li priloženi dokumenti ispunjavaju sve tehničke uslove.

Ovlašteni službenik muftijstva potom označava polje „Procesiralo muftijstvo“ čime se aplikacija prosljeđuje Uredu na dalju obradu.

U slučaju da je u nekoj od organizacionih jedinica došlo do promjene na mjestu službenika koji pristupa sistemu prijave za hadž, organizaciona jedinica je dužna o tome pravovremeno informisati Ured kako bi novom službeniku bilo dodijeljeno korisničko ime i pristupna lozinka.

Treća faza: Uplata cijene putovanja na hadž

Nakon što Ured za hadž i umru predloži, a Rijaset utvrdi cijenu putovanja na hadž 2026. godine, Ured o utvrđenoj cijeni obavještava muftijstva, medžlise putem muftijstava, mešihate i krovne organizacije.

Nadležni službenici potom kontaktiraju putnike sa svog područja i ustupaju im broj bankovnog računa i prateća uputstva o uplati. Službenici medžlisa putnicima daju broj računa nadležnog muftijstava. Službenici u mešihatima i krovnim organizacijama putnicima daju broj računa svoje organizacione jedinice na koji će putnici izvršiti uplatu.

Nakon što svi putnici izvrše uplate organizaciona jedinica prikupljena sredstva prebacuje na račun Rijasetu. Putnici na hadž utvrđeni iznos uplaćuju u konvertibilnim markama na žiro-račun nadležnog muftijstava, a u medžlis prilažu originalnu uplatnicu.

Mešihati i krovne organizacije uplate primaju u valuti države u kojoj se nalaze, u iznosu koji im bude određen od strane Ureda. Izuzetno, putnici iz pojedinih država mogu uplate izvršiti direktno na račun Rijasetu IZ-e.

U koordinaciji sa Uredom i Upravom za ekonomske i finansijske poslove organizacione jedinice novčana sredstva prebacuju na račun Rijasetu. Po transferu sredstava organizacione jedinice su dužne od Uprave za ekonomske i finansijske poslove Rijasetu IZ-e u Bosni i Hercegovini dobiti potvrdu o uplaćenim novčanim sredstvima i istu sa spiskom imena osoba za koje izvršena uplata donijeti u Ured za hadž i umru.

Medžlisi, mešihati i krovne organizacije su dužne sačuvati uplatnice i u slučaju potrebe dati ih na uvid Uredu. Uplatnicu (dokaz o uplati) nije potrebno skenirati niti učitavati u aplikaciju.

O početku procesa uplata organizacione jedinice će biti pravovremeno informisane.

Za operativne aktivnosti organizacione jedinice zadržavaju proviziju u iznosu od 50,00 (pedeset) KM po jednoj uplati, s tim što muftijstva i medžlisi ovaj iznos dijele po pola.



Ured za hadž i umru će informaciju o početku procesa prijavljivanja za hadž 2025. godine objaviti na svojoj web stranici 01.08.2025. Ista će biti prosljeđena Medija centru Islamske zajednice. Imajući u vidu da određeni broj potencijalnih putnika na hadž nije u prilici pratiti elektronske medije, a u namjeri da ova informacija dopre do svakog zainteresiranog i potencijalnog putnika, tražimo da svi hatibi u petak 08.08.2025. prisutne džematlije upoznaju o sljedećem:

- prijave za hadž 2026. godine počinju 11.08.2025. godine u 08:00 sati i zatvaraju se 29.08.2025. u 16:00 sati,
- svaki aplikant mora posjedovati bosanskohercegovački pasoš i s istim aplicira za putovanje na hadž,
- prijave se realizuju putem aplikacije koja se nalazi na web stranici Ureda za hadž i umru,
- u slučaju da broj prijavljenih bude veći od broja koji je dopušten, spisak putnika se formira prema vremenu prijave, a prema sljedećim prioritetima:
 - a) Članovi Islamske zajednice u Bosni i Hercegovini koji prvi put idu na hadž,
 - b) Pripadnici Islamske zajednice u Bosni i Hercegovini koji prvi put idu na hadž,
 - c) Članovi Islamske zajednice u Bosni i Hercegovini koji ponovo idu na hadž za sebe ili kao bedeli,
 - d) Pripadnici Islamske zajednice u Bosni i Hercegovini koji ponovo idu na hadž za sebe ili kao bedeli.
- svaki aplikant je u aplikaciji dužan navesti muftijstvo i medžlis odnosno mešihat ili krovnu organizaciju iz koje dolazi,
- niko ne može popuniti dvije ili više aplikacija,
- svaki aplikant snosi odgovornost za tačnost unesenih podataka,
- aplikanti koji su na spisku putnika bit će kontaktirani radi dostavljanja dokumenata,
- putnik na hadž snosi troškove vakcinacije,
- bosanskohercegovački pasoš mora biti važeći nakon 10.12.2026. godine,
- putnici će o cijeni putovanja biti informisani naknadno,
- svaki hadžija na sebe preuzima odgovornost obavljanja hadža bez dodatne pomoći Ureda.

Nadajući će nastavku konstruktivne saradnje, primite iskrene selame,

S poštovanjem,



Rukovodilac Ureda za hadž i umru

Dževad Hadžić